

禮記集說

十一



禮記集說卷九之一

歸安鄭元慶述

禮運第九之一

疏云案鄭目錄云禮運者以其記五帝三王相變易陰陽旋轉之道此於別錄屬通論 山陰陸氏云禮運者是禮樂之運非道德之運運祚推移而禮行焉雖聖人不能違也然則大同小康時而已矣 福寧黃氏云運謂氣運以所值之會而言也氣運在人則爲帝王禮樂之因革在天則爲陰陽造化之流通然天時人事相爲符應禮樂陰陽相爲表裏故其始也法陰陽而作禮樂其終也以禮樂而贊陰陽此篇大

意不過如此疑出於子游門人之所記中有格言頗入精微似非漢儒所及獨篇首大同小康之說乃謂禮起忠信之衰道德之薄是卽老莊之遺意豈孔子之言哉讀者擇焉可也 京山郝氏云通篇皆爲夫子與子游語篇首至小康夫子爲道不行發歎言偃復問至天下國家可得而正明禮之用急又言偃復問至禮之大成明禮所由起孔子曰嗚呼哀哉至末明所以歎息之意

昔者仲尼與於蜡賓事畢出遊於觀之上喟然而歎仲尼之歎蓋歎魯也言偃在側曰君子何歎孔子曰大道之行也與三代之英丘未之逮也而有志焉

註云蜡者索也歲十二月合聚萬物索饗之 疏云
此篇凡四段自此至小康明孔子爲禮不行而發歎
遂論五帝三王之事孔子蜡祭事畢出遊於觀之上
喟是歎之形貌作記者言其所歎之由蓋疑辭言偃
問歎何事孔子若指言魯失禮恐其太切故廣言之
嚴陵方氏云與祭者必有飲食以勞之故謂之賓
焉大道之行謂五帝之上也三代之英謂三王之時
也以其無名無迹故以道稱之以其代廢代興故以
代稱之禮至於三代其文極矣故以英言之言三代
之爲英以見五帝之爲質以五帝爲大道之行則知
三代爲大道之隱矣 蔣氏云古者上下之間

勢位未隔文法未備而歲時蜡禮之講終以序飲其
重農力本存愛示情之意見於祈祝禱禳之間勞來
勸相之際仁之至義之盡粵自王政不脩而典禮在
魯者望魯之意謂其一變而至於道而不可與他國
共言者也今也聖人傷世僞之寢起知古典之無傳
而於蜡賓畢事之後出爲觀上之遊喟然爲之太息
記者記其所歎在魯不知魯之爲蜡其能盡存於古
否乎魯之郊禘非禮也其蜡可知矣然則發歎之旨
微矣聖人傷古治之不復因蜡禮而有見不有偃也
爲之發問則何以窮夫子感歎之機夫旣以帝者之
事爲大同而指三代爲小康矣而均曰未之逮也而

有志焉何哉此有以見聖人思欲還上古之風而不可得而猶思其次也故其下厯厯言之

愚按註疏據爾雅釋宮觀謂之闕宮門雙闕舊縣法象魏使人觀之處天子兩觀外闕諸侯臺門魯有闕者魯以天子之禮故得有之然相傳魯以周公之故成王命魯公世世祀周公以天子之禮樂而一切宮室制度未聞賜之可以上擬天子也其亦附會明堂位而爲此言與蜡祭者民間亦得行之夫子與蜡賓豈必定然助祭於魯此等處不必致詳

大道之行也天下爲公選賢與能講信脩睦故人不獨

親其親不獨子其子使老有所終壯有所用幼有所長
矜寡孤獨廢疾者皆有所養男有分女有歸貨惡其棄
於地也不必藏於己力惡其不出於身也不必爲己是
故謀閉而不興盜竊亂賊而不作故外戶而不閉是爲
大同

註云不獨親其親子其子孝慈之道廣也分猶職也
歸得良輿之家也貨不必藏於己力不必爲己謂施
無吝心勞事不憚仁厚之教也謀閉不興盜賊不作
尙辭讓之故也同猶和也平也 疏云謀起於詐今
天下一心故圖謀之事閉塞而不起興起也率土皆
然故曰大同 嚴陵方氏云選言擇之而進與言待

之而舉有諸已之謂信交相親之謂睦信與睦人皆有之然有諸已者患於隱而已故講之使明交相親者患其壞而已故脩之使著天生其利人乃不取是以人逆天也故貨棄於地爲可惡人犯其勞我享其效是因人成事也故力不出於身爲可惡取非其有謂之盜伺間而發謂之竊絕理謂之亂毀則謂之賊廬陵馬氏云男有分女有歸使之各得其所也有所厚有所薄有所貪有所吝則機心作於內而盜竊亂賊興於外無所厚無所薄無所貪無所吝則機心盜賊兩皆泯矣如此然後外戶可以不閉 山陰陸氏云選賢與能講信脩睦在六君子之世未嘗廢也

而大道之行異乎此者不家之而已 晉江周氏云
自首至不必爲已總言上古風俗之厚如此選賢與
能是一項講信脩睦是一項通是在上者事至下文
方說到眾人上去使字頂上兩句乃人自相使非上
之人使之也統下老幼男女數句貨力又推進一步
俱以風俗之自然淳厚看兩惡字是自家惡內含貯
貨用力意不必爲已不必藏於已正大道爲公的意
是故承上風俗來故外戶故字又承謀閉二句來大
同謂上恬下熙風俗淳美也 納蘭氏云集說之意
卽以堯授舜舜授禹爲選賢與能是與天下爲公一
意也孔氏正義則云天下爲公者謂天子位也爲公

謂揖讓而授聖德不私傳子孫卽廢朱均而用舜禹
是也選賢與能者曷明不私傳天位此明不世諸侯
也國不傳世惟選賢與能如黜四凶舉十六相之類
此二說皆非也天下爲公乃下文之綱領選賢與能
至不必爲已皆所謂天下爲公也猶下文天下爲家
爲各親其親以下諸句之綱領也

今大道旣隱天下爲家各親其親各子其子貨力爲已
大人世及以爲禮城郭溝池以爲固禮義以爲紀以正
君臣以篤父子以睦兄弟以和夫婦以設制度以立田
里以賢勇知以功爲已故謀用是作而兵由此起禹湯
文武成王周公由此其選也此六君子者未有不謹於

禮者也以著其義以考其信著有過刑仁講讓示民有常如有不由此者在執者去眾以爲殃是爲小康

註云康安也小安之世不如大同之世也言小安者失禮則賊亂將作矣 疏云天下爲家故各親親而子子藏貨於身出力贍已父子曰世兄弟曰及城內城郭外城溝池城之塹紀綱紀也君臣義合故曰正父子天然故曰篤篤厚也兄弟同氣故曰睦夫婦異姓故曰和設宮室衣服車旗飲食上下貴賤之制度田種穀稼之所里居宅之地賢猶崇重也盜賊並作故須勇更相欺妄故須知立功起事不爲他人故姦詐之謀用是爲已而興作而戰爭之兵由此爲已而

發起以其時謀作兵起禹湯等能用禮義成治其爲
三王中之英選也此六君子皆謹於禮以行下五事
是示民爲常法也爲君而不謹於禮以下五事雖在
富貴執位眾人必以爲禍殃共以罪黜退之也廬
陵胡氏云鄭註大人諸侯也案下文禹湯由此則大
人謂天子禮以明義禮以成信禮以補過禮以刑仁
刑猶型也禮以講讓長樂陳氏云其言示民有常
者常者變之對變者能變則常者能化化者人之道
變者天地之道易之坤卦言人之道則曰有常曰化
光至於乾卦言天之道則曰無常曰變化帝則盡天
道故不言常王則盡人道故止於有常而已烏程

姚氏云謀作而兵起唯禮可以已之故六君子皆謹於禮以挽回世道此是一篇之大旨蔣氏云聖人處大同之世固能運無爲之化聖人處小康之時要亦無不盡之心夫惟無不盡之心而後能居小康之時代極治之化當大道之隱使大道之行此極說得有

理 東海胡氏

瑤光

云凡此謹禮以下六事皆示民

有常法之可守總之不可無禮義以爲紀耳

西河

毛氏云帝王傳重唯有父傳子兄傳弟二法而他皆不與故曰大人世及以爲禮蓋父子相繼爲一世而兄弟相繼則謂之兄終弟及故公羊曰一生一及而其法已備並無兄傳弟而弟又可傳兄子者有則非

絕續卽篡弑矣此其法倡自五帝而三代遵之如帝
嚳傳帝摯傳世也帝摯傳弟堯傳及也而夏周傳世
殷商傳及二法劃然然且傳及之法終歸傳世何也
夫傳及者非及之而可已也父子無窮而兄弟有限
縱或一及或再及三及而其旣末一及必須傳世則
是兄之傳弟原歸之父之傳子且此結末一及豈不
知前此之兄皆有父子何難反而傳之兄之子而必
不然者以爲傳及之窮必歸傳世無二法也蓋位無
逆傳季弟傳子則順返而傳之兄之子則逆矣位無
疑傳季傳子則信又傳兄之子則可伯可仲疑矣疑
則爭逆則亂是以兄弟相繼雖名曰及而入廟之後

則總歸父子而稱之爲世卽僖兄閔弟仍以父子之法處之故五廟七廟及亦多有而尙書曰七世之廟荀子曰有天下者事七世是傳重大禮先王限之以二法曰父子兄弟卽有限之以一法曰父子而必不使伯叔父之子羣從得參預於其間何者杜爭亂也是以殷商授受凡二十八君皆兄傳之弟弟傳之子並無弟復傳兄子者唯弟絕而傳兄子則有二君一則太丁未立而死傳弟外丙又傳弟仲壬而仲壬無子始反而傳之太丁之子太甲此一君也一則祖辛傳弟沃甲而沃甲之子南庚年幼先立祖辛之子祖丁而後還南庚乃當未還南庚時祖丁身死已有子

陽甲可傳子矣以爲非法必還之南庚俟南庚無子
然後又傳之祖丁之子陽甲此又一君也外此則太
甲之子沃丁傳弟太庚而太庚子小甲立小甲傳弟
雍已又傳弟太戊而太戊子中丁立中丁傳弟外壬
又傳弟河亶甲而河亶甲子祖乙立祖乙無弟傳子
祖辛祖辛傳弟沃甲而沃甲子南庚立及南庚無子
而還陽甲前所稱二君是也乃陽甲傳弟盤庚又傳
弟小辛又傳弟小乙而小乙子武丁立武丁無弟傳
子祖庚祖庚無弟傳子廩辛廩辛傳弟庚丁而庚丁
子武乙立乃自武乙傳太丁太丁傳帝乙帝乙傳受
辛皆無弟傳子而商祚終焉則是傳弟之後終歸傳

子此一定之法不可暫易是以宋宣讓位於其弟宋
穆而宋穆不傳之子焉而反而傳之兄子與夷則謂
之亂吳諸樊餘祭餘昧兄弟相禪宜及餘昧之子僚
而諸樊之子光篡之則謂之爭亂與爭則弑逆生焉
是明景皇易儲考之古禮按之今情皆無可遺議者
傳世之禮又名正體謂分先君之一體而又當長嫡
謂之正體若傳及之禮則雖母弟父弟皆分先君之
一體而非長非嫡卽謂之體而不正是所謂世與及
者皆以先君之同體爲言謂親子親弟也親弟者謂
同母之弟非然卽同父之弟未有伯叔父之子羣從
兄弟而可言弟及者也明武宗無子已無傳世然又